

318-
EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

魏

陳思王

第二十二冊

V. 22

陳思王集卷之二

明 太倉張溥西銘閱

樂府

詩品云。植詩。源出於國。風骨氣奇高。詞彩華茂。情兼怨雅。體被文質。粲溢今古。卓爾不羣。嗟乎。陳思之于文章也。譬人倫之有周孔。鱗羽之有龍鳳。音樂之有琴笙。女工之有黼黻。俾爾懷鉛吮墨者。抱篇章而景慕。映餘輝以自燭。故孔氏之門。如有詩。則公幹升堂。思王入室。景陽潘陸。自可坐於廊廡之間矣。皓然詩評云。鄴中七子。陳王最。高。劉郎辭氣偏正。得其中。不拘對屬。偶或有之。語與興騁。勢逐情起。不由作意。氣

格自高。十九首其流一也。詩譜云：斲削精
潔。自然沉健。竹林詩評云：曹子建之作亦
正。亦變。駿駿乎大雅之製焉。蘭莊詩話云：
子建詩質樸渾厚。春容雋永。風調非後人
易到。陳子昂李太白慕以爲宗。信乎晉以
下鮮其儷也。予每讀其詩。灑然有千古之
想。無名氏云：選中子建詩。懇惻慷慨。頗有
風人遺意。李夢陽序云：植其音宛。其情危
其言憤切。而有餘悲。殆處危疑之際者乎。
藝苑卮言云：子建天才流麗。雖譽冠千古。
而實避父兄。何以故。材太高。辭太華。又書
云：子建才敏於父兄。然不如其父兄質。漢
樂府之變。
自子建始。

箜篌引

置酒高殿上。親友從我遊。中厨辦豐膳。烹羊宰

肥牛秦箏何慷慨。齊瑟和且柔。陽阿奏奇舞。京
洛出名謳。樂飲過三爵。緩帶傾庶羞。主稱千金
壽。賓奉萬年酬。久要不可忘。薄終義所尤。謙謙
君子德。磬折欲何求。驚風飄白日。光景馳西流。
盛時不可再。百年忽我遒。生存華屋處。零落歸
山丘。先民誰不死。知命復何憂。

薤露行

樂府解題云。曹植
擬薤露行爲天地。

天地無窮極。陰陽轉相因。人居一世間。忽若風
吹塵。願得展功勤。輸力於明君。懷此王佐才。慷

慨獨不群、鱗介尊神龍、走獸宗麒麟、蟲獸猶知、
德、何況於士人、孔氏刪詩書、王業粲已分、騁我
徑寸翰、流藻垂華芬、

惟漢行

魏武帝薤露詩云、惟漢
二十世、所任誠不良、

太極定二儀、清濁始以形、三光炤八極、天道甚
著明、爲人立君長、欲以遂其生、行仁章以瑞、變
故誠、驕盈神高而聽卑、報若響、應聲、明主敬、細
微、三季、曹天經、二皇稱至化、盛哉唐虞庭、禹湯
既厥德、周亦致太平、在昔懷帝京、日晏不敢寗

濟濟在公朝萬載馳其名

平陵東

閭闔開天衢通被我羽衣
粲飛龍粲飛龍與仙
期東上蓬萊採靈芝靈芝採之可服食年若王

父終無極

若一作與

鰕鮒篇

一曰鰕鮒篇按樂府解題云曹植擬長歌行爲鰕鮒

鰕鮒游潢潦不知江海流
燕雀戲藩柴安識鴻
鵠遊世士此誠明大德固無儔
駕言登五嶽然後小陵丘
俯觀上路人勢利惟是謀
讐高念皇

家遠懷柔九州。撫劒而雷音。猛氣縱橫浮汎泊。
徒嗷嗷。誰知壯士憂。

吁嗟篇

選詩拾遺作瑟調飛蓬篇按樂府解題云曹植擬苦寒行爲吁嗟魏

志云植每欲求別見獨談及時政幸冀試用終不能得時法制待藩國峻迫植十一年而三徙都常汲汲無歡

吁嗟此轉蓬。居世何獨然。長去本根逝。宿夜無
休閒。東西經七陌。南北越九阡。卒遇回風起。吹
我入雲間。自謂終天路。忽然下沈泉。驚飈接我
出。故歸彼中田。當南而更北。謂東而反西。宕宕

當何依。忽亡而復存。飄飄周八澤。連翩歷五山。
流轉無恒處。誰知吾苦艱。願爲中林草。秋隨野
火燔。糜滅豈不痛。願與根荄連。泉一作淵
根一作株

豫章行二首

樂府解題云曹植
擬豫章行爲窮達

窮達難豫圖。禍福信亦然。虞舜不逢堯。耕耘處
中田。太公未遭文。漁釣終渭川。不見魯孔丘。窮
困陳蔡間。周公下白屋。天下稱其賢。終一作經

其二

鴛鴦自朋親。不若比翼連。他人雖同盟。骨肉天

性然周公穆康叔管蔡則流言子臧讓千桀季
札慕其賢

蒲生行浮萍篇

浮萍寄清水隨風東西流結髮辭嚴親來爲君
子仇恪勤在朝久無端獲罪尤在昔蒙恩惠和
樂如瑟琴何意今摧頽曠若參與商茱萸自有
芳不若桂與蘭新人雖可愛無若故所歡行雲
有反期君恩儻中還慊慊仰天歎愁心將何翹
日月不恒處人生忽若寓悲風來入懷淚下如

垂露。發篋造裳衣。裁縫紈與素。

懷一作惟。裳一作藝錄。

云詩不能受瑕。工拙之間相去無幾。頓自絕殊。

如塘上行云。莫以賢豪故。棄捐素所愛。莫以魚

肉賤。棄捐葱與薤。莫以麻枲賤。棄捐菅與蒹。浮

萍篇則曰。茱萸自有芳。不若杜與蘭。新人雖可

愛。無若故所歡。本自倫語。然佳不如塘上行。藝

苑厄言云。洛神賦。王右軍大令各書數十本。當

是晉人極推之耳。清徹圓麗。神女之流。陳王諸

賦。皆小言無及者。然此賦始名感甄。又以蒲生

當其塘上。際此忌兄。而不自匿諱。何也。蒲生實

不如塘上。令洛神見之。未免笑子建。傖父耳。

當來日大難

樂府解題云。曹植擬善哉行。爲日苦短。

日苦短。樂有餘。乃置玉樽。辦東厨。廣情故。心相

於。閤門置酒。和樂欣欣。遊馬後來。轅車解輪。今

日同堂出門異鄉別易會難各盡杯觴

丹霞蔽日行

魏文帝詩云丹霞蔽日采虹垂天明帝步出夏門行亦云

紂爲昏亂虐殘忠正周室何隆一門三聖牧野
致功天亦革命漢祚之興階秦之衰雖有南面
王道陵夷炎光再幽殄滅無遺

野田黃雀行

高樹多悲風海水揚其波利劍不在掌結友何
須多不見籬間雀見鵠自投羅羅家得雀喜少
年見雀悲拔劍捎羅網黃雀得飛飛飛飛摩蒼

天來下謝少年。

談藝錄云、氣本尚壯、亦忌銳逸、魏祖云、老驥伏櫪、志在千里、烈

士暮年、壯心不已、猶曖曖也、思王野田黃雀行、譬如雖出囊中、大索露矣、

門有萬里客

門有萬里客、問君何鄉人、褰裳起從之、果得心、所親挽裳對我泣、太息前自陳、本是朔方士、今爲吳越民、行行將復行、去去適西秦、

泰山梁甫行

八方各異氣、千里殊風雨、劇哉邊海民、寄身於草野、妻子象禽獸、行止依林阻、柴門何蕭條、狐

兔翔我宇

怨詩行

明月照高樓。流光正徘徊。上有愁思婦。悲歎有

餘哀。

解一

借問歎者誰。白云蕩子妻。夫行踰十載

賤妾常獨棲。

解二

念君過於渴。思君劇於飢。君作

高山栢。妾爲濁水泥。

解三

北風行蕭蕭。烈烈入吾

耳。心中念故人。淚墮不能止。

解四

浮沉各異路。會

合當何諧。願作東北風。吹我入君懷。

解五

君懷常

不開。賤妾當何依。恩情中道絕。流止任東西。

解六

我欲竟此曲此曲悲且長今日樂相樂別後莫

相忘

此七解栢一作桐

此篇本辭

右一曲晉樂所奏七哀

首及曹子建諸詩如明月照高樓流光正徘徊之類皆思深遠而有餘意言有盡而意無窮也學者當以此等詩常自涵養自然下筆高妙

怨歌行

伎錄樂府解題作古辭郭茂倩樂府作曹植

為君既不易為臣良獨難忠信事不顯乃有見

疑患周公佐成王金縢功不刊推心輔王室二

叔反流言待臯居東國泣涕常流連皇靈大動

變震雷風且寒拔樹偃秋稼天威不可干素服

開金縢、感悟求其端、公旦事既顯、成王乃哀歎、
吾欲竟此曲、此曲悲且長、今日樂相樂、別後莫
相忘、

右一曲晉
樂所奏

輦舞歌五首

序曰漢靈帝西園鼓吹有李堅者能鞞
舞遭亂西隨段熲先帝聞其舊有技召
之堅既中廢兼古曲多謬誤故改作新
歌五篇

古今樂錄云漢曲五篇一曰關

東有賢女二曰章和二年中三
日樂久長四曰四方皇五曰殿前生桂
樹並章帝造魏曲五篇一明明魏皇帝

二大和有聖帝三魏厯長四天生烝民
五爲君旣不易並明帝造以代漢曲其
辭並亡陳思王又有五篇以一聖皇篇以
當章和二年中二靈芝篇以當殿前生
桂樹三大魏篇以當漢吉昌四精微篇
以當關中有賢女五孟冬篇以當狡兔
按漢曲無漢吉昌狡兔二篇疑樂久長
四方皇是也隋書樂志云鞞舞爲巴渝
舞也按樂錄隋志並以鞞舞爲巴渝今
考漢魏二篇歌辭各異本不相亂蓋因
梁陳之世於鞞舞前作巴渝弄遂云一
舞二名殊不知二舞亦容合作猶巾舞
以白紵送豈得便謂白
紵爲巾舞邪失之遠矣

聖皇篇

聖皇應厯數正康帝道休九州咸賓服威德洞

八幽三公奏諸王。不得久淹留。蕃位任至重。舊
章咸率由。侍臣省文奏。陛下體仁慈。沈吟有愛
戀。不忍聽可之。迫有官典憲。不得顧恩私。諸王
當就國。璽綬何累縑。便時舍外殿。宮省寂無人。
主上增顧念。皇母懷苦辛。何以爲贈賜。傾府竭
寶珍。文錢百億萬。采帛若烟雲。粢與服御物。錦
羅與金銀。龍旂垂九旒。羽蓋參班輪。諸王自計
念無功。荷厚德。思一效筋力。糜軀以報國。鴻臚
擁節衛。副使隨經營。貴戚並出送。夾道交輜駟。

車服齊整設韓暄耀天精。武騎衛前後鼓吹簫
笳聲。祖道魏東門淚下霑冠纓。扳蓋因內顧俛
仰慕。○同生行行將日暮。何時還闕庭。車輪爲徘徊。四馬躊躇鳴。路人尚酸鼻。何況骨肉情。

靈芝篇

靈芝生天地。朱草被洛濱。榮華相晃耀。光采曠
若神。古時有虞舜。父母頑且嚚。盡孝於田壠。烝
烝不違仁。伯瑜年七十。綵衣以娛親。慈母笞不
痛。歔歔涕霑巾。丁蘭少失母。自傷蚤孤笑。刻木

當嚴親。朝夕致三牲。暴子見陵侮。犯罪以亡形。
丈人爲泣血。免戾全其名。董永遭家貧。父老財
無遺。舉假以供養。傭作致甘肥。責家填門至。不
知何用歸。天靈感至德。神女爲秉機。歲月不安
居。嗚呼我皇考。生我旣已晚。棄我何其早。蓼莪
誰所興。念之令人老。退詠南風詩。灑淚滿禕袍。
亂曰。聖皇君四海。德教朝夕宣。萬國咸禮讓。百
姓家肅虔。庠序不失儀。孝弟處中田。戶有曾閔
子。比屋皆仁賢。髫鬣無天齒。黃髮盡其年。陛下

三萬歲慈母亦復然

困學紀聞云陳思王靈芝篇云伯瑜年七十綵衣以

娛親今人但知老萊子之事而不知伯瑜

大魏篇

大魏應靈符天祿方甫始聖德致泰和神明爲
驅使左右爲供養中殿宜皇子陛下長壽考群
臣拜賀咸悅喜積善有餘慶寵祿固天常衆喜
填門至臣子蒙福祥無患及陽遂輔翼我聖皇
衆吉咸集會凶邪姦惡並滅亡黃鵠遊殿前神
鼎周四阿玉馬克乘輿芝蓋樹九華白虎戲西

除舍利從辟邪。騏驥躡足舞鳳皇。桴翼歌豐年。
大置酒。玉樽列廣庭。樂飲過三爵。朱顏暴已形。
式宴不違禮。君臣歌鹿鳴。樂人舞輦鼓。百官雷
抃讚。若驚儲禮如江海。積善若陵山。皇嗣繁且
熾。孫子列曾玄。群臣咸稱萬歲。陛下長壽樂年。
御酒停未飲。貴戚跪東廂。侍人承顏色。奉進金
玉觴。此酒亦真酒。福祿當聖皇。陛下臨軒笑。左
右咸歡康。杯來一何遲。群僚以次行。賞賜累千
億。百官並富昌。

精微篇

精微爛金石，至心動神明。杞妻哭死夫，梁山爲之傾。子丹西質秦，烏白馬角生。鄒衍囚燕市，繁霜爲夏零。關東有賢女，自字蘇來卿。壯年報父仇，身沒垂功名。女休逢赦書，白刃幾在頸。俱上列仙籍，去死獨就生。太倉令有罪，遠徵當就拘。自悲居無男，禍至無與俱。緹縈痛父言，荷擔西上書。盤桓北闕下，泣淚何漣如。乞得并姊弟，沒身贖父軀。漢文感其義，肉刑法用除。其父得以

免辯義在列圖多男亦何爲一女足成居簡子
南渡河津吏廢舟船執法將加刑女媚擁櫂前
妾父聞君來將涉不測淵畏懼風波起禱祝祭
名川備禮饗神祇爲君求福先不勝醑祀誠至
令犯罰艱君必欲加誅乞使知罪讐妾願以身
代至誠感蒼天國君高其義其父用赦原河激
奏中流簡子知其賢歸聘爲夫人榮寵超後先
辯女解父命何況健少年黃初發和氣明堂德
教施治道致太平禮樂風俗移刑措民無枉怨

女復何爲。聖皇長壽考。景福常來儀。

孟冬篇

孟冬十月。陰氣厲清。武官誠田。講旅統兵。元龜
襲吉。元光著明。蚩尤蹕路。風弭雨停。乘輿啟行。
鸞鳴幽軋。虎賁采騎。飛象珥鵲。鐘鼓鏗衛。簫管
嘈唱。萬騎齊鑣。千乘等蓋。夷山填谷。平林滌藪。
張羅萬里。盡其飛走。趯趯狡兔。揚白跳翰。獵以
青骹。掩以脩竿。韓盧宋鵲。呈才騁足。噬不盡縹。
率麋倚鹿。魏氏發機。養基撫弦。都盧尋高。搜索

猴狻。慶忌。孟賁。蹈谷超巒。張目決眚。髮怒穿冠。
頓熊扼虎。蹴豹搏貙。氣有餘勢。負象而趨。獲車
既盈。日側樂終。罷役解徒。大饗離宮。亂曰。聖皇
臨飛軒。論功校獵。徒死禽積。如京流血。成溝渠
肉。明詔大勞。賜大官供。有無走馬。行酒醴。驅車布
肉。魚鳴鼓。舉觴爵。擊鍾酌。無餘絕網。縱麟麇。弛
罩出鳳雛。收功在羽校。威靈振鬼區。陛下長歡

樂永世合天符。

綱一作
網襍曲

桂之樹行

桂之樹。桂之樹。桂生一何麗。佳。揚朱華而翠葉。
流芳布天涯。上有棲鸞。下有盤螭。桂之樹。得道
之真人。咸來會講仙。教爾服食日精。要道甚省
不煩。淡泊無爲。自然棄躋。萬里之外。去留隨意
所欲存。高高上際於衆外。下下乃窮極地天。

當牆欲高行

龍欲升天。須浮雲。人之仕進。待中人。衆口可以
鑠金。讒言三至。慈母不親。憤憤俗間。不辯僞真。
願欲披心。自說陳君門。以九重道遠。河無津。

當欲游南山行

東海廣且深。由卑下百川。五嶽雖高大。不逆垢
與塵。良木不十圍。洪條無所因。長。者。能。博。愛。天。
下。寄。其。身。大匠無弃材。船車用不均。錐刀各異
能。何所獨卻前。嘉善而矜愚。大聖亦同然。仁者
各壽考。四坐咸萬年。

當事君行

人生有所貴。尚出門各異情。朱紫更相奪。色雅
鄭異音聲。好惡隨所愛憎。追舉逐聲名。百心可

事一君巧詐宜拙誠

當車以駕行

歡坐玉殿會諸貴客侍者行觴主人離席顧視
東西廂絲竹與鞞鐸不醉無歸來明燈以繼夕
妾薄命二首

携玉手喜同車北上雲閣飛除釣臺蹇產清虛
池塘觀沼可娛仰泛龍舟綠波俯擢神草枝柯
想彼宓妃洛河退詠漢女湘娥

觀一作靈

其二

日月旣逝。西藏更會。蘭室洞房。華燈步障。舒光皎若。日出扶桑。促樽合坐。行觴主人起舞。盜盤能者。穴觸別端。騰觚飛爵。闌干同量。等色齊顏。任意交屬。所歡朱顏。發外形。蘭袖隨禮容。極情妙舞。僊僊體輕之。解履遺絕。纓俛仰笑。喧無呈覽。持佳人玉顏。齊舉金爵。翠盤手形。羅袖良難。腕弱不勝。珠環坐者。歎息舒顏。御金裊粉。君傍中有。霍納都梁。雞舌五味。襍香進者。何人齊姜。恩重愛深。難忘。召廷親好。宴私。但歌盃來何遲。

客賦既醉言歸。主人稱露未晞。日月既逝、藝文作日既逝矣華

燈步障舒光、玉臺作花燭步帳輝煌、舉玉臺作接、

名都篇

歌錄云名都美女白馬、竝齊瑟行也皆以首句名篇

名都多妖女、京洛出少年。寶劍直千金、被服麗且鮮。鬪雞東郊道、走馬長楸間。馳騁未能半、雙兔過我前。攬弓捷鳴鏑、長驅上南山。左挽因右發、一縱兩禽連。餘巧未及展、仰手接飛鳶。觀者咸稱善、衆工歸我妍。歸來宴平樂、美酒斗十千。膾鯉膾胎鰕、炮鼈炙熊蹯。鳴儔嘯匹侶、列坐竟

長筵連翩擊鞠攘巧捷惟萬端白日西南馳光

景不可攀雲散還城邑清晨復來還

復齋謾錄云曹植詩

鬪雞東郊道走馬長楸間陳沈炯邊馬有歸心
詩彌意長楸道金鞍背落暉杜子美玉花驄詩
頓驟飄赤汗踟躕顧長楸畫馬圖詩霜蹄蹴踏
長楸間苕溪漁隱云文選注古人種楸於道故
曰長楸野客叢書云歷陽郭次象多聞嘗與僕
論唐酒價郭謂前輩引老杜詩速令相就飲一
斗恰有三百青銅錢以此知當時酒價然白樂
天與劉夢得沽酒間飲詩曰共把十千沽一斗
相看七十欠三年當劉白之時酒價何大不廉
哉僕謂不然十千一斗乃詩人寓言此曹子建
樂府中語耳唐人引此甚多如李白詩曰金樽
沽酒斗十千王維詩曰新豐美酒斗十千崔輔
國詩云與沽一斗酒恰用十千錢許渾詩云十
千沽酒留君醉崔德輿詩云十千斗酒不知貴

陸龜蒙詩云若得奉君歡、十千沽一斗、唐人言
十千一斗類然、一斗三百錢、獨見子美所云、故
引以定當時之價、然詩人所言、出於一時、又未
知果否、一斗三百、別無可據、唐食貨志云、德宗
建平三年、禁民酤以佐軍費、置四釀酒、斛收直
三千、此可驗乎、又觀
玠談藪、北齊盧思道
嘗云、長安酒賤、斗價三百、杜詩引此、亦未可知
僕因謂郭曰、曾知漢酒價否、郭無以應、僕謂漢
酒價每斗一千、郭謂出於何書、僕曰、此見典論
云、考靈帝末年、百司酒酒一斗直千文、此可證
也、丹鉛餘錄云、古書不可妄改、聊舉一端、如曹
子建名都篇、膾鯉勝胎蝦、寒鼈炙熊臠、此舊本
也、五臣妄改作包鱉、文選李善注云、今之時餉
謂之寒、蓋韓國饌用此法、鹽鐵論羊淹雞寒、崔
駰傳亦有雞寒、曹植文、寒鴈蒸麕、劉熙釋名、韓
雞爲正、古字寒與韓通也、按丹鉛此論、誠爲有
據、然詩有云、包
鼈膾鯉、包亦通、

美女篇

美女妖且閑。採桑歧路間。柔條紛冉冉。落葉何
翩翩。攘袖見素手。皓腕約金環。頭上金爵釵。腰
佩翠琅玕。明珠交玉體。珊瑚間木難。羅衣何飄
颻。輕車隨風還。顧盼遺光彩。長嘯氣若蘭。行徒
用息駕。休者以忘餐。借問女安居。乃在城南端。
青樓臨大路。高門結重關。容華耀朝日。誰不希
令顏。媒氏何所營。玉帛不時安。佳人慕高義。求
賢良。獨難。衆人徒嗷嗷。安知彼所觀。盛年處房

室中夜起長歎

白馬篇

白馬飾金羈，連翩西北馳。借問誰家子，幽并遊俠兒。少小去鄉邑，揚聲沙漠垂。宿昔秉良弓，楛矢何參差。控弦破左的，右發摧月支。仰手接飛猱，俯身散馬蹄。狡捷過猴猿，勇剽若豹螭。邊城多警急，胡虜數遷移。羽檄從北來，厲馬登高隄。長驅蹈匈奴，左顧陵鮮卑。棄身鋒刃端，性命安可懷。父母且不顧，何言子與妻。名編壯士籍，不

得中顧私捐軀赴國難視死忽如歸

苦息行

綠蘿緣玉樹光曜粲相暉下有兩真人舉翅翮
高飛我心何踴躍思欲攀雲追鬱鬱西岳顛石
室青蔥與天連中有耆年一隱士鬚髮皆皓然
策杖從吾遊教我要忘言

升天行二首

樂府解題云曹植又有上仙
籙與神遊五遊龍欲升天等

篇皆傷人世不永俗情險艱當求神仙
翱翔六合之外與飛龍仙人二遊篇前

緩聲歌

同意

乘蹻追術士、遠之蓬萊山、靈液飛素波、蘭桂上
參天、玄豹遊其下、翔鵠戲其顛、棄風忽登舉、彷彿見衆仙

其二

扶桑之所出、乃在朝陽谿、中心陵蒼昊、布葉蓋
天涯、日出登東榦、旣久沒西枝、願得紆陽轡、廻
日使東馳、

五遊篇

九州不足步、願得凌雲翔、逍遙八紘外、遊目歷

遐荒披我丹霞衣，襲我素霓裳。華蓋紛掩藹，六
龍仰天驤。曜靈未移景，倏忽造昊蒼。閭闔啟丹
扉，雙闕曜朱光。徘徊文昌殿，登陟太微堂。上帝
休西櫺，羣后集東廂。帶我瓊瑤佩，漱我沆瀣漿。
踟躕玩靈芝，徒倚弄華芳。王子奉仙藥，羨門進
奇方。服食享遐紀，延壽保無疆。

遠遊篇

楚辭遠遊章云：悲時俗之迫阨兮，願輕舉而遠遊。質菲薄而無因兮，焉託乘而上浮。王逸云：遠遊者，屈原之所作也。屈原履方直之行，不容於世，困於讒佞，無所告訴，乃思與仙人俱遊戲，周歷大地，無所不至焉。

遠遊臨四海。俯仰觀洪波。大魚若曲陵。承浪相經過。靈鼈戴方丈。神岳儼嵯峨。仙人翔其隅。玉女戲其阿。瓊蕊可療飢。仰首吸朝霞。崑崙本吾宅。中州非我家。將歸謁東父。一舉超流沙。鼓翼舞時風。長嘯激清歌。金石固易弊。日月同光華。齊年與天地。萬乘安足多。

仙人篇

樂府廣題云秦始皇三十六年使博士爲仙人詩遊行天下令樂

人歌之曹植仙人篇曰仙人攬六著言人生如寄當養羽翼徘徊九天以從韓終王喬於天衢也齊陸瑜又有仙人攬六著篇蓋出於此

仙人攬六著對博太山隅湘娥撫琴瑟秦女吹
笙竽玉樽盈桂酒河伯獻神魚四海一何局九
州安所如韓終與王喬要我於天衢萬里不足
步輕舉凌太虛飛騰踰景雲高風吹我軀廻駕
觀紫微與帝合靈符閶闔自嵯峨雙闕萬丈餘
玉樹扶道生白虎夾門樞驅風遊四海東過王
母廬俯觀五岳閒人生如寄居潛光養羽翼進
趣且徐徐不見昔軒轅升龍出鼎湖徘徊九夫
下與爾長相須

飛龍篇

楚辭離騷云爲余駕飛龍兮襟

者乘飛龍而昇天與楚辭同意

晨遊泰山雲霧窈窕忽逢二童顏色鮮好棄彼

白鹿手翳芝草我知真人長跪問道西登玉堂

金樓復道授我仙藥神皇所造教我服食還精

補腦壽同金石永世難老

鬪雞篇

春秋左氏傳云季郈之雞鬪季氏介其雞郈氏爲之金距杜預云擣

芥子播其羽也或云以膠沙播之爲介雞鄴都故事云魏明帝大和中築鬪雞臺趙王石虎亦以芥羽漆砂鬪雞于此故曹植詩云鬪雞東郊道走馬長楸間

是也

遊目極妙伎，清聽厭宮商。主人寂無爲，眾賓進
樂方。長筵坐戲客，鬪雞觀閒房。羣雄正翕赫，雙
翅自飛揚。揮羽邀清風，悍目發朱光。翬落輕毛
散，嚴距往往傷。長鳴入青雲，扇翼獨翱翔。願蒙
狸膏助，常得擅此場。

盤石篇

盤石山巔石，飄飄澗底蓬。我本太山人，何爲客
淮東。萑葭彌斥土，林木無分重。岸巖若崩缺，湖

水何洶洶蚌蛤被濱涯光彩如錦虹高彼凌雲
霄浮氣象螭龍鯨脊若上陵鬚若山上松呼吸
吞船櫂澎湃戲中鴻方舟尋高價珍寶麗以通
一舉必千里乘颶舉帆幢經危履險阻未知命
所鍾常恐沈黃壚下與鼃鼈同南極蒼梧野遊
眄窮九江中夜指參辰欲師當定從仰天長太
息思想懷故邦乘桴何所志于嗟我孔公

驅車篇

驅車揮駑馬東到奉高城神哉彼太山五嶽專

其名隆高貫雲霓。嵯峨出太清。周流二六候。間
置十二亭。上有涌醴泉。玉石揚華英。東北望吳
野。西眺觀日精。魂神所繫屬。逝者感斯征。王者
以歸天。效厥元功成。厯代無不遵。禮記有品程。
探策或長短。唯德享利貞。封者七十帝。軒皇元
獨靈。食霞漱沆瀣。毛羽被身形。發舉蹈虛廓。徑
廷升窈冥。同壽東父年。曠代永長生。

種葛篇

種葛南山下。葛藟自成陰。與君初婚時。結髮恩

義深歡愛在枕席宿昔同衾衾竊慕棠棣篇好
樂和瑟琴。行年將晚暮佳人懷異心思紀曠不
接。我情遂抑沈出門當何顧徘徊步北林下有
交頸獸仰見雙棲禽攀枝長歡息淚下沾羅襟
良馬知我悲延頸代我吟昔爲同池魚今爲商
與參。往古皆歡遇我獨困於今。弃置委天命悠
悠安可任

棄婦篇

石榴植前庭綠葉搖縹青丹華灼烈烈璀璨彩有

光榮光榮曄流離。可以處淑靈。有鳥飛來集拊
翼以悲鳴。悲鳴夫何爲。丹華實不成。拊心長歎
息。無子當歸甯。有子月經天。無子若流星。天月
相終始。流星沒無精。棲遲失所宜。下與瓦石并
憂懷從中來。歎息通雞鳴。反側不能寐。逍遙於
前庭。踟躕還入房。蕭蕭帷幕聲。牽帷更攝帶。撫
弦調鳴箏。慷慨有餘音。要妙悲且清。收淚長歎
息。何以負神靈。招搖待霜露。何必春夏成。晚穫
爲良實。願君且安甯。

詩

上責躬應詔詩

魏書云植文帝弟建安中封平原侯徙臨菑侯既以

才見異而丁儀丁廙楊脩等為之羽翼
太祖狐疑幾為太子者數矣而植任性
而行不自彫勵飲酒不節文帝御之以
術矯情自飾故遂定為嗣文帝即王位
誅丁儀丁廙植與諸侯並就國黃初二
年監國謁者灌均希指奏植醉酒悖慢
劫脅使者有司請治罪帝以太后故貶
爵安鄉侯其年改封鄆城侯三年立為
鄆城王四年徙封雍丘王其年朝京都
上疏并獻詩又有應詔詩帝嘉勉之

臣自抱釁歸藩刻肌刻骨追思罪戾晝

分而食夜分而寢誠以天網不可重離

聖恩難可再恃。竊感相鼠之篇。無禮遄死之義。形影相弔。五情愧赧。以罪弃生。則違古賢。夕改之勸。忍活苟全。則犯詩人。胡顏之譏。伏惟陛下德象天地。恩隆父母。施暢春風。澤如時雨。是以不別荊棘者。慶雲之惠也。七子均養者。尸鳩之仁也。舍罪責功者。明君之舉也。矜愚愛能者。慈父之恩也。是以愚臣徘徊於恩澤。而不能自弃者也。前奉詔書。臣等絕

朝心離志絕。自分黃耆無復執珪之望。
不圖聖詔猥垂齒召。至止之日。馳心輦
轂。僻處西館。未奉闕庭。踴躍之懷。瞻望
反仄。謹拜表獻詩二篇。其辭曰

於穆顯考。時惟武皇。受命于天。寧濟四方。朱旗
所拂。九土披攘。玄化滂流。荒服來王。超商越周。
與唐比蹤。篤生我皇。奕世載聰。武則肅烈。文則
時雍。受禪于漢。君臨萬邦。萬邦旣化。率繇舊則。
廣命懿親。以藩王國。帝曰爾侯。君茲青土。奄有

海濱。方周于魯。車服有輝。旗章有敘。濟濟雋乂。
我弼我輔。伊予小子。恃寵驕盈。舉挂時網。動亂
國經。作藩作屏。先軌是隳。傲我皇使。犯我朝儀。
國有典刑。我削我紕。將寘于理。元兇是率。明明
天子。時惟篤類。不忍我刑。暴之朝肆。違彼執憲。
哀予小臣。改封充邑。于河之濱。股肱弗置。有君
無臣。荒淫之闕。誰弼予身。煢煢僕夫。于彼冀方。
嗟予小子。乃罹斯殃。赫赫天子。恩不遺物。冠我
玄冕。要我朱紱。朱紱光大。使我榮華。剖符受玉。

王爵是加。仰齒金璽。俯執聖策。皇恩過隆。祇承
怵惕。答我小子。頑兇是嬰。逝慙陵墓。存愧闕庭。
匪敢傲德。實恩是恃。威靈攸加。足以沒齒。昊天
罔極。生命不圖。常懼顛沛。抱罪黃墟。願蒙矢石
建旗東嶽。庶立毫釐。微功自贖。危軀授命。知足
免戾。甘赴江湘。奮戈吳越。天啟其衷。得會京畿。
遲奉聖顏。如渴如飢。心之云慕。愴矣其悲。天高
聽卑。皇旨照微。于漢魏志作炎漢。紂集作黜。時
惟篤類一作時篤同類。臣一作
子。大。一作天。玉。一
作土。生。魏志作性。

應詔詩

李周翰云應詔來京師於道所見對詔而作

肅承明詔。應會皇都。星陳夙駕。秣馬脂車。命彼
掌徒。肅我征旅。朝發鸞臺。夕宿蘭渚。芒芒原隰。
祁祁士女。經彼公田。樂我稷黍。爰有樛木。重陰
匪息。雖有餽糧。飢不遑食。望城不過。面邑匪游。
僕夫警策。平路是繇。玄駟藹藹。揚鑣漂沫。流風
翼轡。輕雲承蓋。涉澗之濱。緣山之隈。遵彼河滌。
黃坂是階。西躋關谷。或降或升。驂駢倦路。載寢
載興。將朝聖皇。匪敢晏寗。弭節長驚。指日遄征。

前驅舉燧後乘杭旌。輪不輟運。鑾無廢聲。爰暨
帝室。稅此西墉。嘉詔未賜。朝覲莫從。仰瞻城闕。
俯惟闕庭。長懷永慕。憂心如醒。

朔風詩

李周翰云。時爲東阿王。在藩感北風思歸。故有此詩。文選總一章。集作五章。今分注爲五章。而不顯列其數。蓋兩存之也。

仰彼朔風。用懷魏都。願騁代馬。倏忽北徂。凱風

永至。思彼蠻方。願隨越鳥。翻飛南翔。

其一

四氣代

謝。懸景運周。別如俯仰。脫若三秋。昔我初遷。朱

華未希。今我旋止。素雪云飛。

其二

俯降千仞。仰登

天阻風飄蓬飛載離寒暑千仞易陟天阻可越

昔我同袍今永乖別其子好芳草豈忘爾貽繁

華將茂秋霜悴之君不垂眷豈云其誠秋蘭可

喻桂樹冬榮其絃歌蕩思誰與銷憂臨川慕思

何爲汎舟豈無和樂游非我隣誰忘泛舟愧無

榜人其五 柳依依今我來思雨雪霏霏又云昔我往矣楊

矣黍稷方華今我來思雨雪載塗可謂善道行

役之情矣曹子建效其語云昔我初遷朱華永

希今我旋止素雪云飛則不逮遠矣且子建欲

學風雅爲四言而猶未忘朱華素雪之屬對此

其所以止於建安黃初歟

矯志詩

芝桂雖芳。難以餌烹。尸位素餐。難以成名。磁石
引鐵。於金不連。犬朝舉士。愚不聞焉。抱璧塗乞。
無爲貴寶。履仁遘禍。無爲貴道。鴛雛遠害。不羞
卑棲。靈虬避難。不耻污泥。都蔗雖甘。杖之必折。
巧言雖美。用之必滅。濟濟唐朝。萬邦作孚。闕逢
蒙雖巧。必得良弓。聖王雖知。必得英雄。螳螂見
歎。齊士輕戰。越王軼蛙。國以死獻。道遠知驥。世
僞知賢。覆之幬之。順天之矩。澤如凱風。惠如時

兩口爲禁闥。舌爲發機。門機之闥。桔矢不追。芝桂

雖芳。今本作芳樹。雖香。聖藝文作賢。必得藝文作亦待。

元會詩

晉書禮志。漢儀有正會禮。正旦受賀。公侯以下。執贊來庭。二千石以

上。升殿稱萬歲。復作樂燕饗。魏帝都鄴。正會文昌殿。用漢儀

初歲元祚吉日惟良。乃爲嘉會宴此高堂。衣裳

鮮潔黼黻。玄黃珍膳。襍遯克溢。圓方俯視。文軒

仰瞻。華梁願保茲善。千載爲常。歡笑盡娛樂哉。

未央皇室榮貴壽考無疆。善一作喜。室一作家。

有美一人、被服纖羅、妖姿艷麗、蓊若春華、紅顏
韓、曄、雲、髻、嵯、峨、彈、琴、撫、節、爲、我、絃、歌、清、濁、齊、均、
既、亮、且、和、取、樂、今、日、遑、恤、其、他、

公讌詩

此在鄴宮、與兄丕讌飲時、
武帝在、故稱丕爲公子、

公子敬愛客、終宴不知疲、清夜遊西園、飛蓋相

追隨、明月澄清影、列宿正參差、秋蘭被長坂、朱

華冒綠池、潛魚躍清波、好鳥鳴高枝、神飈接丹

轂、輕輦隨風移、飄飄放志意、千古長若斯、

詩家直說

云子建已有響字、朱華冒綠池、
時雨靜飛塵、冒靜二字是矣、

侍太子坐

白日曜青春。時雨靜飛塵。寒冰辟炎景。涼風飄
我身。清醴盈金觴。餽饌縱橫陳。齊人進奇樂。歌
者出西秦。翩翩我公子。機巧忽若神。景一作氣
奇一作嘉

贈徐幹

劉良云子建與徐幹俱不見
用有怨刺之意故爲此詩

驚風飄白日。忽然歸西山。圓景光未滿。衆星燦
以繁。志士營世業。小人亦不閒。聊且夜行游。游
彼雙闕間。文昌鬱雲興。迎風高中天。春鳩鳴飛
棟。流焱激櫺軒。顧念蓬室士。貧賤誠足憐。薇藿

弗充虛。皮褐猶不全。慷慨有悲心。與文自成篇。
寶弃怨何人。和氏有其愆。彈冠俟知己。知己誰
不然。良田無晚歲。膏澤多豐年。亮懷璫璵美。積
久德逾宣。親交義在敦。申章復何言。逾五臣作愈

贈丁儀

李善云。與都亭侯丁翼。今云儀。誤也。魏畧曰。丁儀字正禮。太祖辟爲掾。呂向云。魏志儀有文才。子建贈以此詩。有怨刺之意。

初秋涼氣發。庭樹微銷落。凝霜依玉除。清風飄
飛閣。朝雲不歸山。霖雨成川澤。黍稷委疇隴。農
夫安所穫。在貴多忘賤。爲恩誰能博。狐白足禦

冬。焉念無衣客。思慕延陵子。寶劍非所惜。子其
宜爾心。親交義不薄。禦五臣作御

贈王粲

端坐苦愁思。攬衣起西滌。樹木發春華。清池激
長流。中有孤鴛鴦。哀鳴求匹儔。我願執此鳥。惜
哉無輕舟。欲歸忘故道。顧望但懷愁。悲風鳴我
側。義和逝不留。重陰潤萬物。何懼澤不周。誰令
君多念。自使懷百憂。

又贈丁儀王粲

集云答丁敬禮王仲宣善云翼字敬禮儀誤也

從軍度函谷，驅馬過西京。山岑高無極，涇渭揚
濁清。壯哉帝王居，佳麗殊百城。貝闕出浮雲，承
露槩泰清。皇佐揚天惠，四海無交兵。權家雖愛
勝，全國爲令名。君子在末位，不能歌德聲。丁生
怨在朝，王子歡自營。歡怨非貞則，中和誠可經。

岑一作峯

贈丁翼

文士傳云，翼字敬禮，儀之弟也，爲黃門侍郎。

嘉賓填城闕，豐膳出中厨。吾與二三子，曲宴此
城隅。秦箏發西氣，瑟揚東謳。肴來不虛歸，觴

至反無餘。我豈狎異人朋友與我俱大國多良
材。譬海出明珠。君子義休侍。小人德無儲。積善
有餘慶。榮枯立可須。滔蕩固大節。時俗多所拘。
君子通大道。無願爲世儒。

贈白馬王彪

集云於圈城作。魏志云。楚王彪字朱虎。時封白馬王。後徙

封楚。任城王彰字子文。並武帝子。彰建
安中爲北中郎將。伐烏丸有功。文帝黃
初三年爲任城王。四年朝京。不卽得見
忿怒暴薨。藝苑卮言云。子建謂帝承
明廬。明月照高樓。子桓西北有浮雲。秋
風蕭瑟。非鄴中諸子可及。仲宣公幹遠
在下風。吾每至謁帝一章。便數十過。不
可了。悲婉宏壯。情事理境。無所不有。又

云陳思王贈白馬王彪詩。全法大雅文。玉之什。體以故首二章不相承耳。後人不知合而爲一者。良可笑也。

序曰。黃初四年正月。白馬王任城王與余俱朝京師。會節氣到洛陽。任城王薨。至七月。與白馬王還國。後有司以二王歸蕃。道路宜異宿止。意每恨之。蓋以大別在數日。是用自剖。與王辭焉。憤而成篇。

謁帝承明廬。逝將歸舊疆。清晨發皇邑。日夕過

首陽伊洛廣且深。欲濟川無梁。汎舟越洪濤。怨

彼東路長。顧瞻戀城闕。引領情內傷。廣一作曠

其二

大谷何寥廓。山樹鬱蒼蒼。霖雨泥我塗。流潦浩
縱橫。中逵絕無軌。改轍登高岡。修坂造雲日。我
馬立以黃。大五臣作太

其三

玄黃猶能進。我思鬱以紆。鬱紆將何念。親愛在
離居。本圖相與偕。中更不克俱。鴟梟鳴衡轡。豺

狼當路衢蒼蠅間。白黑讒巧令親疎。欲還絕無
蹊。攬轡止踟蹰。何念今本作難
進今本作反

其四

踟蹰亦何留。相思無終極。秋風發微涼。寒蟬鳴
我側。原野何蕭條。白日忽西匿。歸鳥赴喬林。翩
翩厲羽翼。孤獸走索群。銜草不遑食。感物傷我
懷。撫心長太息。太魏志
作嘆

其五

太息將何爲。天命與我違。奈何念同生。一往形

不歸孤魂翔故域、靈柩寄京師、存者忽復過、亡
沒身自哀、人生處一世、忽若朝露晞、年在桑榆
間、影響不能追、自顧非金石、咄嗟令心悲、復一作已

喈一作咤

其六

心悲動我神、弃置莫復陳、丈夫志四海、萬里猶
比隣、恩愛苟不虧、在遠分日親、何必同衾幃、然
後展慇懃、憂思成疾疹、無乃兒女仁、倉卒骨肉
情、能不懷苦辛。

其七

苦辛何慮思，天命信可疑。虛無求列仙，松子久
吾欺。變故在斯須，百年誰能持。離別永無會，執
手將何時。王其愛王體，俱享黃髮期。收淚卽長

路，援筆從此辭。

路志作塗

送應氏詩二首

劉良云：送璩、瑒兄弟時，董卓遷獻帝于西京，洛陽被

燒故多言
荒蕪之事

步登北邙阪，遙望洛陽山。洛陽何寂寞，宮室盡
燒焚。垣牆皆頓擗，荊棘上參天。不見舊耆老，但

陽明三集 卷二
觀新少年、側足無行徑、荒疇不復田、游子久不
歸、不識陌與阡、中野何蕭條、千里無人烟、念我
平常居、氣結不能言、平常居一作平生親

其二

清時難屢得、嘉會不可常、天地無終極、人命若
朝霜、願得展○嫵○婉○我○友○之○朔○方○親○昵○並○集○送○置○
酒○此○河○陽○中○饋○豈○獨○薄○賓○飲○不○盡○觴○愛○至○望○苦○
深○豈○不○愧○中○腸○山○川○阻○且○遠○別○促○會○日○長○願○爲○
比○翼○鳥○施○翮○起○高○翔○昵五臣作睚

三良詩

左傳云秦伯任好卒以子車氏三子奄息仲行鍼虎爲殉皆秦之良

也詩人作黃鳥以哀之劉良云植被文帝責黜意者是悔不從武帝而作是詩

功名不可爲、忠義我所安、秦穆先下世、三臣皆
自殘、生時等榮樂、旣沒同憂患、誰言捐軀易、殺
身誠獨難、攬涕登君墓、臨穴仰天歎、長夜何冥
冥、一往不復還、黃鳥爲悲鳴、哀哉傷肺肝、

遊仙詩

人生不滿百、戚戚少歡娛、意欲奮六翮、排霧凌
紫虛、蟬蛻同松喬、翻跡登鼎湖、翱翔九天上、騁

轡遠行遊、東觀扶桑曜、西臨弱水流、北極玄天

渚、南翔陟丹上、

威威一作歲歲
玄天一作登玄

襍詩六首

李善云此六篇並託喻傷政急
朋友道絕賢人爲人竊勢別京

已後在鄆城
思鄉而作

高臺多悲風、朝日照北林、之子在萬里、江湖迴
且深、方舟安可極、離思故難任、孤鴈飛南游、過
庭長哀吟、翹思慕遠人、願欲托遺音、形影忽不
見、翩翩傷我心

其二

轉蓬離本根，飄飄隨長風。何意迴飈舉，吹我入
雲中。高高上無極，天路安可窮。類此游客子，捐
軀遠從戎。毛褐不掩形，薇藿常不充。去去莫復
道，沈憂令人老。游客一作流宕

其三

西北有織婦，綺縞何繽紛。明晨秉機杼，日晏不
成文。太息終長夜，悲嘯入青雲。妾身守空閨，良
人行從軍。自期三年歸，今已歷九春。飛鳥繞樹
翔，噉噉鳴索群。願爲南流景，馳光見我君。飛王臺作

孤

其四

南國有佳人。容華若桃李。朝游江北岸。夕宿瀟

湘沚。時俗薄朱顏。誰爲發皓齒。俛仰歲將暮。榮

耀難久恃。

俛一作俯。夕宿瀟湘。沚善作日。夕宿湘沚。

其五

僕夫早嚴駕。吾將遠行遊。遠行欲何之。吳國爲

我仇。將騁萬里途。東路安足由。江介多悲風。淮

泗馳急流。願欲一輕濟。惜哉無方舟。閒居非吾

志甘心赴國憂

遠行五臣作行遠都玄敬詩話云曹子建禠詩閒居非吾志

甘心赴國憂又云國讐諒不塞甘心思喪元老瞞而有是兒宜不助其奸雄

其六

飛觀百餘尺臨牖御櫺軒遠望周千里朝日見

平原烈士多悲心小人媮自閒國讐亮不塞甘

心思喪元拊劒西南望思欲赴太山絃急悲聲

發聆我慷慨言

御五臣作仰

閨情

一作禠詩

攬衣出中閨逍遙步兩楹閒房何寂寞綠草被

堦庭空室自生風。百鳥翩南征。春思安可忘。憂
 戚與我并。佳人在遠道。妾身單且笑。歡會難再
 遇。芝蘭不重榮。人皆棄舊愛。君豈若平生。寄松
 為女蘿。依水如浮萍。齋身奉衿帶。朝夕不墮傾。
 儻終顧盼恩。永副我中情。
室一作穴。儻終顧盼恩一作儻能終顧盼。

七哀詩

玉臺作襍詩樂府作怨歌行本辭

明月照高樓。流光正徘徊。上有愁思婦。悲歎有
 餘哀。借問歎者誰。言是蕩子妻。君行踰十年。孤
 妾常獨棲。君若清路塵。妾若濁水泥。浮沈各異

勢會合何時諧。願爲西南風。長逝入君懷。君懷

良不開。賤妾當何依。

韻語陽秋云七哀詩起曹子建。其次則王仲宣張孟

陽釋詩者謂病而哀、義而哀、感而哀、悲而哀、耳目聞見而哀、口歎而哀、鼻酸而哀、謂一事而七者具也。子建之七哀在於獨棲之思。婦。仲宣之七哀在於弃。子之。婦。人。張孟陽之七哀在。於。已毀之。園。寢。唐陶雍亦有七哀詩。所謂君若無定雲。妾作不動山。雲行出山易。山逐雲去難。是皆以一哀而七。者具也。

情詩

玉臺作
襍詩

微陰翳陽景。清風飄我衣。遊魚潛綠水。翔鳥薄天飛。眇眇客行士。遙役不得歸。始出嚴霜結。今

來白露晞遊子歎黍離處者歌式微慷慨對嘉
賓悽愴內傷悲

喜雨詩

天覆何彌廣苞育此群生弃之必憔悴惠之則
滋榮慶雲從北來鬱述西南征時雨中夜降長
雷周我庭嘉種盈膏壤登秋畢有成

七步詩

本集不載世說新語云文帝嘗令東阿王七步中作詩不成者行大法應聲便爲七步詩帝有慚色

煮豆持作羹漉豉以爲汁其向釜下然豆在釜

中泣。本是同根生。相煎何太急。

其向一作其在。金下一作金中。

煮豆燃豆其豆在釜中泣。本是同根生相煎

何太急

漫叟詩話云曹子建七步詩世傳煮豆燃豆其豆在釜中泣一本云其向

釜下燃豆在釜中泣其工拙淺深必有以辨之者

失題

見藝文鶴部

雙鶴俱遨遊。相失東海傍。雄飛竄北朔。雌驚赴南湘。棄我交頸歡。離別各異方。不惜萬里道。但

恐天網張。

離友詩二首

并序

鄉人有夏侯威者，少有成人之風。余尚其爲人，與之昵好。王師振旅，送余於魏邦，心有眷然，爲之隕涕。乃作離友之詩，其辭曰：

王旅遊兮背故鄉，彼君子兮篤人綱。媵余行兮歸朔方，馳原隰兮尋舊疆。車載奔兮馬繁驤，涉浮濟兮泛輕航。迄魏都兮息蘭房，展宴好兮惟

樂康

車一作我車

其二

涼風肅兮白露滋，木感氣兮柔葉辭。臨淶水兮

登重基折秋華。今采靈芝尋永歸。今贈所思感

離隔。分會無期。伊鬱悵。今情不怡。本集止載前一首。今考藝

文附入初學記載二句云日匿景。今天微陰。經迴路。今造北林。當別有一首也。

妬詩

嗟爾同衾。曾不是志。宜彼冶容。安此妬忌。

髑髏詩

牢落冥冥與道相。駢隱然長寢。其樂無踰。

豔歌

出自薊北門。遙望胡池桑。枝枝自相值。葉葉自

相當

樂府

墨出青松烟筆出狡兔翰古人感鳥跡文字有
改判

芙蓉池

逍遙芙蓉池翩翩戲輕舟南楊棲雙鵠北柳有
鳴鳩

言志

慶雲未時興雲龍潛作魚神鸞失其儔還從燕

崔居

襍詩

悠悠遠行客，去家千餘里。出亦無所之，入亦無所止。浮雲翳日光，悲風動地起。

陸王集

陸王集

陸王集

陸王集

陸王集

陸王集

補遺

正會詩

初歲元祚吉日惟良乃爲嘉會讌此高堂尊卑
列叙典而有章衣裳鮮潔黼黻玄黃清酤盈爵
中坐騰光珍膳雜遘克溢圓方笙磬旣設琴瑟
俱張悲歌厲響咀嚼清商俯視文軒仰瞻華梁
願保茲善千載爲常歡笑盡娛樂哉未央室家
榮貴壽若東皇

本集前載並
從藝文未全

樂府歌

膠漆至堅，浸之則離。皎皎素絲，隨染色移。君不
我棄，讒人所爲。

古詞

還行秋殿，入侍君王。椒房丹帷，楚組連綱。

樂府

市肉取肥，酤酒取醇。交觴接盃，以致慇懃。

苦熱行

行遊到日南，經歷交趾鄉。苦熱但暴露，越夷水

中藏。

結客篇

結客少年場、報怨洛北荒、

樂府歌詞

所賁千金劍、通犀間碧璵、翡翠飾鷄壁、標首明月珠、

陌上桑

望雲際、有真人、安得輕舉繼清塵、執電鞭、馳飛麟、

雜詩

美玉生磐石，寶劒出龍淵。帝王臨朝服，秉此威
百蠻。

遺句

如彼翰鳥，或飛戾天。

善哉行

復爲時所拘，羈紲作

微臣。

天地篇

長者賜顏色，

善哉行

泰山可動移。

豔歌行

巢許

蔑四海，商賈爭一錢。

樂府歌

齊謳楚舞紛紛，

樂府歌

歌聲

上徹青雲。

歷九秋妾薄命行

夏節純和，天清涼，百草滋

植，舒蘭芳。

豔歌行

日匿景，今天微陰。經迴路，今造

北林。

離友詩

膏沐誰爲容，明鏡闇不治。

七哀詩

人遠

精神近。寤寐夢容光。離別詩一顧千金重何必珠

玉賤

陳思王集

卷八

本傳

陳思王植字子建。年十歲餘。誦讀詩論及辭賦。數十萬言。善屬文。太祖嘗視其文。謂植曰。汝倩人邪。植跪曰。言出爲論。下筆成章。願當面試。奈何倩人。時鄴銅爵臺新成。太祖悉將諸子登臺。使各爲賦。植援筆立成。可觀。太祖甚異之。性簡易。不治威儀。輿馬服飾。不尚華麗。每進見難問。應聲而對。特見寵愛。建安十六年。封平原侯。十九年。徙封臨菑侯。太祖征孫權。使植留守鄴。戒

之曰。吾昔爲頓丘。今年二十三。思此時所行。無
悔于今。今汝年亦二十三矣。可不勉與。植旣以
才見異。而丁儀。丁廙。楊脩等爲之羽翼。太祖狐
疑。幾爲太子者數矣。而植任性而行。不自雕勵。
飲酒不節。文帝御之以術。矯情自飾。宮人左右。
竝爲之說。故遂定爲嗣。二十二年。增植邑五千
并前萬戶。植嘗乘車行馳道中。開司馬門出。太
祖大怒。公車令坐死。由是重諸侯科禁。而植寵
日衰。太祖旣慮終始之變。以楊脩頗有才策。而

又袁氏之甥也。於是以罪誅修。植益內不自安。二十四年。曹仁爲關羽所圍。太祖以植爲南中郎將。行征虜將軍。欲遣救仁。呼有所勅戒。植醉不能受命。於是悔而罷之。文帝卽王位。誅丁儀。丁廙并其男口。植與諸侯竝就國。黃初二年。監國謁者灌均希指奏植醉酒悖慢。劫脅使者。有司請治罪。帝以太后故。貶爵安鄉侯。其年改封鄴城侯。三年。立爲鄴城王。邑二千五百戶。四年。徙封雍丘王。其年朝京都。上表獻詩二篇。帝嘉

其辭義優詔答勉之六年帝東征還過雍丘幸
植宮增戶五百太和元年徙封浚儀二年復還
雍丘植常自憤怨抱利器而無所施上疏求自
試三年徙封東阿五年復上疏求存問親戚因
致其意詔報如王所訴植復上疏陳審舉之義
帝輒優文答報其年冬詔諸王朝六年正月其
二月以陳四縣封植爲陳王邑三千五百戶植
每欲求別見獨談論及時政幸冀試用終不能
得旣還悵然絕望時法制待藩國旣自峻迫寮

屬皆賈豎下才，兵人給其殘老，大數不過二百人。又植以前過，事事復減半。十一年中而三徙都，常汲汲無歡，遂發疾薨。時年四十一，遺令薄塋，以小子志保家之主也。欲立之初，植登魚山，臨東阿，喟然有終焉之心。遂營爲墓，子志嗣。徙封濟北王。景初中，詔曰：「陳思王昔雖有過失，旣克已慎行，以補前闕。且自少至終，篇籍不離於手，誠難能也。其收黃初中諸奏，植罪狀公卿已下，議中書、尚書、秘書三府、大鴻臚者，皆削除之。」

撰錄植前後所著賦頌詩銘雜論凡百餘篇。副
藏內外。志累增邑并前九百九十戶。

陳思王集卷二終

